

006430 03 71 2009 43 02

RESOLUCIÓN REITORAL POLA QUE SE CONVOCAN AXUDAS PARA A MOBILIDADE DE COORDINADORES ACADÉMICOS ERASMUS DA USC CARA O ESPAZO EUROPEO DE EDUCACIÓN DENTRO DO PROGRAMA DE APRENDIZAXE PERMANENTE (PAP) – ERASMUS

CARACTERÍSTICAS XERAIS DAS AXUDAS

A Universidade de Santiago de Compostela, a través da Vicerreitoría de Política Internacional, convoca axudas para a mobilidade de coordinadores/as do Programa de Aprendizaxe Permanente (PAP), actividade Erasmus, no curso académico 2009-10.

Poderá participar todo o persoal docente da USC que teña recoñecida a súa condición de Coordinador Académico Erasmus.

O persoal docente que participa nun programa de mobilidade debe estar integrado no departamento ou na facultade do centro de acollida. Isto implica que a mobilidade está baseada en acordos interinstitucionais (contratos erasmus).

Estas axudas serán compatibles con calquera outro tipo de bolsas e axudas de natureza pública ou privada.

OBXECTIVOS DAS AXUDAS

Os obxectivos xerais da mobilidade son:

- Supervisar e solucionar as diversas circunstancias que poidan xurdir no ámbito do intercambio que coordinan.
- Consolidar vínculos entre departamentos e facultades.
- Preparar futuros proxectos de cooperación.
- O Organismo Autónomo de Programas Europeos (OAPEE) sinala a posibilidade de financiar con carácter excepcional algunha visita preparatoria, aínda que non existira unha previa relación entre as dúas universidades.

DOTACIÓN DAS AXUDAS

As axudas destinaranse a compensar os custos de mobilidade adicionais, como os gastos da viaxe e o custo de vida superior no país de acollida. Non se destinarán a cubrir a totalidade dos custos.

Os gastos de aloxamento e manutención calcularanse baseándose nas tarifas diarias establecidas oficialmente para o país de destino e os gastos de desprazamento de acordo cos gastos reais.

A dotación económica máxima non excederá dos 1.000 euros por coordinador/a e desprazamento.

Con carácter xeral, unicamente se financiará un desprazamento por coordinador/a.

REQUISITOS DOS SOLICITANTES

Os solicitantes deberán ser coordinadores/as da Acción Erasmus do Programa de Aprendizaxe Permanente.

Aquelas solicitudes que non cumpran este requisito serán automaticamente rexeitadas.

SOLICITUDES E LUGAR DE PRESENTACIÓN

Os solicitantes deberán presentar no momento de facer a solicitude o impreso de solicitude de mobilidade (MV), debidamente cuberto, que se achega como Anexo I desta convocatoria.

As solicitudes dirixiranse a Oficina de Relacións Exteriores.

A presentación das solicitudes farase no Rexistro Xeral da USC, situado na Reitoría da USC (Colexio de San Xerome. Praza do Obradoiro s/n, Santiago de Compostela) e no Rexistro do Campus de Lugo, situado no edificio de Servizos Administrativos da Biblioteca Intercentros (Avda. de Bernardino Pardo Ouro s/n, Lugo). Tamén poderá presentarse nas formas e lugares establecidos na lei de Réxime Xurídico das Administracións Públicas e do Procedemento Administrativo Común.

PRAZO DE PRESENTACIÓN

Do 4 de novembro ao 2 de decembro de 2009.

ADMITIDOS E EXCLUÍDOS:

A Comisión de Selección publicará, nos 30 días seguintes despois de finalizado o prazo de presentación de solicitudes e antes da súa valoración, no taboleiro de anuncios da Reitoría e da Vicerreitoría de Lugo, así como na páxina web da Oficina de Relacións Exteriores da USC (<http://www.usc.es/ore>), a relación de aspirantes admitidos e excluídos.

Para emendar os defectos da publicación anterior os aspirantes non admitidos e excluídos poderán xustificar o seu dereito a ser admitidos, no prazo de 10 días hábiles, contados a partir do día seguinte á publicación, quedando excluídos definitivamente de non facelo.

AVALIACIÓN E SELECCIÓN

A Comisión de Selección estará integrada por:

- O vicerreitor de Política Internacional.
- O vicerreitor adxunto de Investigación e Proxección Exterior.
- O xefe da Oficina de Relacións Exteriores.

A USC levará a cabo a selección de conformidade coas directrices proporcionadas pola OAPEE. Neste senso:

- A USC adoptará todas as medidas necesarias para evitar calquera conflito de intereses entre as persoas que poidan tomar parte no proceso de selección de beneficiarios individuais.
- Co obxecto de garantir a participación do maior número posible de coordinadores, darase prioridade aos participantes que disfruten por primeira vez da mobilidade de coordinación.
- Os informes e resultados de pasadas convocatorias (mobilidades) poderán ser considerados pola comisión de selección para os efectos oportunos.
- O número real de estudantes (nacionais e internacionais) coordinados nos últimos dous cursos académicos será tido en conta como criterio de selección específico.

PRAZO DE REALIZACIÓN DA MOBILIDADE

O prazo máximo de realización é o 30 de setembro de 2010.

OBRIGAS DOS SELECCIONADOS

Os/as beneficiarios/as dunha mobilidade deberán presentar a seguinte documentación no prazo máximo dun mes a contar a partir da data de finalización da mobilidade:

1. Informe final de resultados segundo modelo normalizado.
2. Tarxetas de embarque e/ou billete físico e factura da axencia de viaxes (ou recibo de compra electrónico).
3. Certificado ou constancia da Universidade de acollida firmado e selado.

PROPOSTA DE CANDIDATOS

Os taboleiros de anuncios nos que se publicará a resolución definitiva serán o da Reitoría e o da Vicerreitoría de Lugo, sen prexuízo da súa publicación complementaria na páxina web <http://www.usc.es/ore>.

Contra a presente resolución, que esgota a vía administrativa, poderá interporse recurso contencioso-administrativo perante o xulgado do contencioso-administrativo de Santiago de Compostela/Lugo no prazo de dous meses a contar dende o día seguinte á súa publicación, de conformidade cos artigos 46 e 8.2.a) da Lei da Xurisdición Contencioso Administrativa, aprobada por Lei 29/1998, do 13 de xullo.

Non obstante, os/as interesados/interesadas poderán interpor recurso potestativo de reposición no prazo dun mes perante o órgano que o ditou. Neste caso non se poderá interpor o recurso contencioso-administrativo anteriormente indicado en tanto non recaia resolución expresa ou presunta do recurso potestativo de reposición, ao abeiro dos artigos 116 e ss. da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común, modificada pola Lei 4/1999, do 13 de xaneiro.

Santiago de Compostela, 3 de novembro de 2009

O REITOR

Por delegación de competencias resolución reitoral de 12 de maio de 2009

DOG do 26 de maio de 2009



O vicerreitor de Política Internacional